



Komunikado di Prensa

14 di yùli 2022

CAft ta konsehá Konseho di Minister di Reino pa duna Konseho di Minister di Aruba un instrukshon

Oranjestad – Kolegio di supervishon finansiero di Aruba (CAft) a Konseha Konseho di Minister di Reino (RMR) dia 13 di juli 2022 pa duna Konseho di Minister di Aruba un instrukshon. Pais Aruba mester limitá e défisit presupuestario maksimalmente na 2022 i realisá un surplus presupuestario for di 2023 pa di e forma aki yega na e redukshon di debe nesesario.

Ya pa basta tempu CAft ta ekspresando su preokupashon tokante finansa públiko di Aruba. Tantu promé komo despues di e krisis di COVID-19 a kana vários trayekto di skucha tur dos banda, a base di e Ordenansa Nashonal tokante di Supervishon finansiero temporal di Aruba (LAft), i a informá RMR na diferente momentu tokante e situashon finansiero di Aruba, kual ta di preokupashon. Pa loke ta trata e presupuesto aprobá di 2022, CAft a konkluí atrobe ku Aruba no ta tumando suficiente medida pa kontrolá e gastunan riba presupuesto den forma struktural i Aruba ta konfia demasiado riba oumento di entrada i riba koberturanan insidental pa konsolidashon di e presupuesto.

Apesar ku ekonomia a mehorá fuertemente na 2021 i apesar ku pa 2022 tambe tin indikashon ku lo tin un rekuperashon robusto, e défisit di finasashon di Pais Aruba na 2022 ta yega e montante di AWG 227 mion, kual ta ekivalente na 4,0 porshento di e Produkto Interno Bruto (PIB). Esaki ta nifiká ku e debe di Aruba lo oumentá innesesariamente den 2022. Segun e presupuesto di mas aña, e debe lo sigui oumentá te 2026 i lo superá ampliamente AWG 6 miar. Konsekuentemente, e karganan di interes ta bai pone un preshon kada bes mas grandi riba finansa públiko. Den e periodo 2023-2027 Aruba lo mester paga mas ku AWG 4 miar bèk. Esaki ta nifiká ku lo mester refinansiá mayoria di Aruba su debe riba término kòrtiku.

Pais Aruba no ta tumando suficiente medida pa kontrolá e gastunan riba presupuesto, i ta konfia demasiado riba oumento di entrada pa konsolidashon di e presupuesto. CAft ta mira riesgo grandi, tambe teniendo na kuenta e aktual subida di interes. CAft ta konsiderá ku ta nesesario pa bini ku medida pa limitá kresementu di e debe na 2022 i realisá un surplus presupuestario for di 2023, i di e forma ei yega na redukshon di e debe, pa por reanudá e kaminda pa un finansa públiko sostenibel.

Awor ku a finalisá e trayekto di skucha tur dos banda den kaso di e presupuesto aprobá di 2022, CAft ta konstatá ku Aruba ta kumpliando di forma suficiente ku solamente un di e diestres rekomendashonnan. Lo por kumpli ku dos mas di e diestres rekomendashonnan, si riba término kòrtiku Aruba prosedé na implementashon di e medidanan, manera frismentu parsial di vakaturanan ku mester yena ainda (roll-overs) i kòrtamentu di e pagonan di overtime. Pa loke ta trata e sobrá rekomendashonnan, CAft ta konstatá ku Aruba no ta sigui nan òf no ta sigui nan sufisientemente. Konsekuentemente CAft ta yega na e konklushon ku no ta laga ni e presupuesto di 2022 ni e presupuesto di mas aña kumpli sufisientemente ku artíkulo 14 di LAft i e protokòl.

Mirando ku Aruba no ta demostrá sufisientemente ku e mes ta bai reanudá e kaminda pa finansa públiko sostenibel, CAft no ta mira ningun otro opshon ku konsehá un instrukshon. Ta keda na RMR pa disidí si en bèrdat ta bini un instrukshon, i, si esei ta e kaso, kiko lo ta kontenido eksakto di esaki.



[Fin di e Komunikado]

Fotógrafo:

Ton Verkuijlen

Teksto pa foto:

CAft ta konsehá Konseho di Minister di Reino pa duna Aruba un instrukshon.

Nota pa redakshon – no pa publikashon

Kontakto na CAft:

Sekretariado Kolegio di supervishon finansiero di Aruba

Telefòn +5999 461-9081 / +5999 461-9082 / +5999 461-9084

Email info@cft.cw

Website www.cft.cw

Persona di kontakto pa prensa:

Jefka Alberto

Telefòn +5999 512-6861